

义门记

江州陈氏宗族繁盛衣冠济美和气蔼于门庭淳风彰于邦国按其宗谱乃陈宜都王叔明之后五世孙兼唐元宗开十六年举进士及第官赠秘书少监为右补阙仍留翰林院生京官至给事中集贤院学士乏嗣以从子褒为子官至监官令生灌为高安县丞其后子孙鏞讳伯宣者隐处庐山注司马迁史记行于世诏徵不起生檀檀生旺居德安县太平乡长乐里旺生机机生感感生兰兰生青青生伉仲侍俛伟仲六子生孙十七十七又生三十四自是家益昌族益炽矣至仲之孙端数世未尝分异益置田园为家法戒子孙择群从以掌其事建书堂以教诲之其家法序曰我家袭秘监之累功承著作之诒谋代传孝弟上下和睦但子孙之众多不无智愚之或异苟无董率之条恐乖敦睦之义今设之以局务垂之以规程推功任能懲恶劝善必令子孙世守家规永蹈和睦云云爰立主事以专家政置库司以掌家财立庄长以督赋租学院以教童稚道院以业焚修巫法以备祈祷医师以供药石东佳书院以待学者德宇廨宇以奉公门其余酒浆监米之储衣裳笄箱之具三师饮食之节四序宴会之期长幼出入之仪晨昏定省之礼婚姻吊丧送往迎来赏以劝善罚以

惩恶凡诸纖悉莫不周详其于臧获不入于门鷹犬不以为玩天文图纬之学纵横權变之谋佛图桑门之言商贾营贩之利禁之不习室无私财廚无異饌大小知教内外如一唐僖宗闻其事诏旌其门南唐又为之立义门免其徭役崇子衮衮子昉端子聚聚子英仲九世同居长幼凡七百口不蓄婢妾人无间言每食必群坐广堂未成童者别为一席有犬百余共一牢食一犬不至群犬亦皆不食建书楼以延四方之士乡里率化唐知州上其事诏仍免其徭役至兢之世子孙益众尝苦乏食淳化初殿中丞唐戡知江州事奏陈氏一家骨肉千口饥贫难济诏本州每岁贷粟二千石其后兢从弟旭止受贷粟之半云省嗇而食可以及秋成熟岁歉粟贵或劝旭全受而糴可邀善价旭日朝廷以旭家群从千口賑其乏食贷以公粟岂可见利忘义耶帝闻深加歎奖至道中太宗遣内侍裴愈赍御书散江表三吴名山寺观德义之家皆赐一本陈氏所得凡三十三卷藏之于家愈復上陈氏家法二篇太宗览毕叹曰真良家也愈言陈氏每岁贷粟四千余斛距江州二百余里舟楫不通尝费二千余斛脚值若就德安县仓库给发以免车马驿料则天恩加惠义门者厚矣太宗许之自是省费官民称便夫陈氏始以二百人而家法行三百口而义门立开寶之初共计七百四十口咸平三年增至一千四百七十八口春秋传曰五世其昌并于正

卿八世之后莫之与京自旺至青五世矣至袞八世矣袞立义门昉主家政三十五年由昉以下俱擅词场文学之英才也均受官职衣冠之荣耀也斯为五世而昌八世而大非独陈完之在齐矣天地一气也万民一姓也政教一体也而为清为濁为善为恶顾亦有不同者以予觀陈氏之宗则皆清而纯善而和义而正盖才不矜技不衡清纯者也富不骄贫不怨善和者也义门之称洵不欺也天兵之讨江州陈氏昆弟七人在围中及贼破军民杀伤殆尽七人異处全归一无所伤义之感也至道以来仍岁饥荒陈氏举宗啜粥杂以藻菜怡然相安义之至也余与太常博士陈君靖相善有年尝览陈氏世谱阅家法询事实具知其状因为之记并繫之辞曰

累仁積德其后必昌
家法堪式义门表德
尚义则崇尚利则穷
在昇及煜犹然敦勗
圣宗万年子孙亿千

煜煜陈宗文风克颺
旌表在上示为法则
伊维陈宗世袞淳风
逮我圣宗恩惠骈属
德泽旁流福寿绵绵

时

大宋己亥春月吉日

公元一一一九年

翰林院学士王禹偁撰